

**AKASHVANI AIZAWL**  
**REGIONAL NEWS UNIT**  
**REGIONAL NEWS BULLETIN**  
**(MIDDAY)**



**BASHINI APP**

Sorkar laipuiin ram chhunga tawng hrang hrangte awlsam taka in hriat pawh zung zung theihna tura tawnglehna application a siam, Bashini-ah Mizo tawng telh tura hmalakna a kal chho mek.

Akashvani News Aizawl zawhna chhangin, ICT Informatics Officer Pu C Lalrinfela chuan Bhashini hi sorkar laipui hmalakna 'National Language Translation Mission' a ni a. Tunlai thiamna Artificial Intelligence (AI) nena tangkawpin India rama tawng hrang hrang te hmun leh hmunah lehlin theihna a ni a, tun dinhmunah he app hian hmun leh hmunah tawng 22 a let chhuak thei a, Mizo tawng pawh telh ve tura hmalak niin, AI-in Mizo tawng a hriatthiam theih nan sorkar laipui chuan inelna siamin tun dinhmunah company 3- IIT Guwahati TawngTwister, Mizoram atangin- Mizomade leh MIZO AW te chuan inelna thawh 2-na an hmachhawn leh mek a, he app-ah hian Mizo tawng mumal leh dik taka leh tir theih an tum tih sawiin, ziaka tawng lehna Text to text translation chu hman theihin an buatsaih hmasa phawt ang a, zawi zawiin aw atanga tawng let thei, voice based lamah hma an la chho zel dawn a ti a, kuminah chuan engemaw ber chu a hman theih a beisei thu a sawi bawk a ni.

Linguistic lama mi thiam Dr Laltleipuii chuan Digital khawvelah kan chen tawh avangin Mizo tawng pawh AI-a luhpui a nih loh chuan a thi vat dawn a ti a, Mizotawng thuziak leh lam rik dan te chu AI-in a hriat thiam tur zawnga vawn that a pawimawh hle tih sawiin, AI model-in Mizo tawng dik taka a hriatthiam theih nan tawng lama mithiam bikte nen AI tana kaihhraina felfai tak siam a tul tih a sawi a ni.



**PIB**

Punjab leh Himachal Pradesh atanga Media mi 6 chuan Press Information Bureau buatsaihna hnuaiah Mizoram an rawn tlawh.

He Press Tour hi PIB Jalandhar-a Media & Communication officer, Vikram Jain-a'n a kaihruai a, Team te hian Pathianni khan Mizoram an rawn thleng a, Mizorama hmun hrang hrang tlawh kualin, vawiin khan All India Radio station,

Tuikhuahtlang an tlawh a. Akashvani News Aizawl zawhna chhangin Team member zinga pakhat Prattek Jain chuan vawiin hi Mziorama an cham ni 4-na a ni tih sawiin, an rawn thlen tuk khan Sairang rel station an tlawh a, Sairang a rel rawn lut chu Mizoram leh Mizo mipuite tan sum leh pai dinhmun lama hmasawna lian tak thlentu a ni dawn a ti a. DIPR Mizoram leh MJA te nen an inkawm bawk a, Mizorama lirthei tlan dan, Traffic mumal tak awm leh Mizo mipuite civic sense neih that zia an hmu chu entawntlak a tih thu a sawi a, nimin khan Thenzawl-a Thermal power plant an tlawh a, nature nghawng chhe si lovin ni khatah unit 40,000 a siam chhuak thei chu tha an tih thu a sawi a, Mizoram leh a chhunga chengte khawsakphung chungchang chu mi zawng zawngin an hriat ve tul an tih avangin North India-a chanchinbu hrang hrangah te an chhuah nghal tih a sawi a ni.

Mizoram tlawh a rawn zin Media mi 6 zinga 4 te chu Punjab mi niin, midang 2 chu Himachal Pradesh a mite an ni a, Inrinni hian Mizoram an chhuahsan dawn a ni.



## **WORLD TB DAY**

Zoram Medical College & Hospital, Falkawn-a Faculty Doctors Association (ZFDA) chuan Operation Kingdom Ministry (OKM), Phunchawng-ah Multi Speciality Free Clinic an nei.

OKM-ah hian Mizoram hmun hrang hrang atangin zu leh ruihhlo vanga harsatna nei mi 450 vel an awm mek a, vawiin khan ZMC&H-a thawk Specialist Doctor sawmthum leh panga (35) chuan heng mi 450 bawr vel te chu a thlawnin an hriselna an endik sak a, damdawi thahnem tak a thlawnin an pe bawk a ni.

